

1 Tímóti Ebeq sáhnsahwe ahtebé ehwehne.

Tímótine anowawé Asiu iní míowana wenabowe nahnso aní míowe. Poraga Tímóti áwáhnorúwana wega Porane ehweh tábúsoqme sehgiuve. Mah pahsíípéq Poraga Tímótinsabé mahrarue teawena, Péhe éhwéh irare keyábewé, Manikánsabe iwíah íwíah ate sansánsábewé, Sísa tagaríah kéráq wahnahno keyábewé, Sísa tagaríah ké síwáhnoréna kaweq sansá sehgieyabewé, orenínsó kéweinínsó séhréh ariteyabewé, tauntahunue arambehriéyabewé, móneyabé kawerue iwiáhhéyabewé, áwáhnorúwe. Poraga mah ehwéhkákáq mó ehwéhkákáq mah pahsíípéq sehiranúwe.

Poraga Tímóti ebeq awu pahsíe.

¹ Tímótio, íné Porane páhsíi sáhnsahwe tagáhno. Sísa Karáhéreq Maniká ite kaweraitéh ánínseqka, Sísa éhwéh kosíwáhnorúno aintera eqmaq núwátóye. Mókake Sísa Karáhéba kaweq matábúrápéq oga mía míaonehe íwíahúne.

² Ínega Sísa éhwéh áwáhnorurautaq ahtebarona puah are nénahni úkurone. Maniká Iteriboreq Sísa Karáhé itene Wahnahnseqka are séhréh atera sirutaboiratera arene aru ukiq atagéhe.

*Péhe éhwéhnsábé ahqáho ataneheqmúne i
ehwéhne.*

3 Íné Másérónía marákórápéq pokinaurautaq arensabé, Épésa suwahpeq míahno éna amahnága moq mitaq míahno teawúge. Táhmaro areba míah kégá péhe éhwéh síwáhnorowe. Arega mi keyábé, Itene péhe éhwéh mó síwáhnoriyehboq túbáh agoro terio.

4 Áwahe ehwehnkakáq sigaqnaréh síwíqmari iwíáho ehwéhnkákáq síwáhnorowara íráh kégá ehwehowe. Mina tahnsa éhwéhnkáwé peh mügu wahgu iwíáh aritahnara Manikáne sansá íre ahtebahrahowe. Minayabe, Túbáh agoro terio. Sísansabé aiq pútare atéhranka ahtebahrahowe.

5 Kawerue síwáhnorinaraq íréhra kegá ahbabáq íre miraia sirupipeq mó keyábé sirutaboiraritagéhe. Sirupipeqté áhbábáq sánsánsábé íre sirutaboiréra peh kawe qtaq míéhransabe sirupipeq pehwehrue míagehe. Sísansabé aiq pútare atéhra puara mó keyábé sirutaboiraritagéhe.

6 Táhmaro kegá mi kawéq sánsá sinehepeq suera peh seyene iwiáhéra peh abehq éhwéhmárínowe.

7 Segá Manikánka sehgóro ú ehweh síwáhnoréyabe suwahbówe. Ite aiq ahtebóne iwiáhéra síwáhnoro ehwéh sirupipeq íre irasa pehipi irare irareowe.

8 Ite tagarionawe Mósísiga sehgóro ú ehwehnká wehukene ahbabáq sansa sokigiorahi ehwéhne. Mi ehwéhnká ahbabáq sansa sokigi inkeheéna Manikánka mi ehwéh omaq atowe. Mi ehwéhnká miraínaraq aiq kaweq ehwéhne atone.

9 Mósísiga sehgóro ú ehwehmé íre peh morá kaweq keyábé sehgóro irarúwe. Írakaumo.

Wene ehweh anterúáh kewé, píribahri kewé, Manikánsabe suwahrieh kewé, ahbabáq kewe Manikáne sansánsábé suwahriehre éra peh mah marákóípéqté sánsá sehgó kewé sinoibo subiq súáh kewé mó ke subiq súáh kewé moke mina tahnsa kékabéwé mi ehwéh irarúwe.

10 Mó kené ahre weh abariira kewé wehukenínká mó áwáhu wehukéní ahkaragára sansá mirao kewé mó kené animári aebóo kewé péhe ehwéh irare kewé mó keyábé péhepehe aritewé moke mó íre kaweq sansá mirao keyábé Mósísiga sehgóro ú ehwéh teriuwe. Moke mina tahnsa ahbabáq kégá aiq pútaq ehwéh anterúáhwe.

11 Aiq pútaq ehwéhmé íre mó ehwéhne. Írakaumo. Peh morá Manikánka korerio teniátái ehwéhne. Ínéga wene kaweq ehwéhmé teríú ání múge. Mi ehwéhnká, Maniká págege anínéna anotah tehrehrabeq mía míai aníne teíre. Minayabe iwíáhéna wensabé iwíáh iwíáh atóge.

Manikánka wensabé arutaboirúnsabe Poraga kaweróne ato ehwéhne.

12 Itene Wahnah Sísa Karáhéga wene arambehri mirainkeheéna eqmaq núwátáire. Ínéga kawerue arambehrinawire iwíáhéna págege aintaráire. Minayabe kaweróne atóge.

13 Íné Sísa íre tagariarautaq íné wene naruó aní míarauge. Wene naruó aní ména wensabé áwíoqnéna éhruru atáráuge. Wensabé íre aiq pútare atena peh muguwahgu aní ména mi ahbabáruraugana wega ínénabe arutaboiraintena insahwé aintaráire.

14 Itene Wahnah Sísa Karáhéga iwíáh aintena íné anotah sehréh aintárái puana wensabé aiq pútare atena nirutaboirurauge.

15 Ahbabáqka ite saiqnariaraitaq Sísa Karáhéga ite meirena kaweraitanieéna mah marákóípéq tumíowe. Tumío ehwéhmé anotah kawéq éhwéh púaq ómiga aiq ahtebahrahúne. Ahtebéq aiq pútaq ehwéhne irarúne. Áhnte ahbabáq ké míáhwana ínéga ahbabáq aní míaraugana néne ahbabáqka moke mó kené ahbabáq kiotaikuraire.

16 Kiotaikurairara mah kehiná kéhínánká, Sísa ahriahri uwaresa ání míéhre tagageheéna wega ínénabe arutaboiréna kaweraintaráire. Kaweraintaráirara wehukega íné tagéra iwíáhera, Ite moq kaweraitahráhire éra aiq pútare atéhransabé oga mérapeq awaq miagéhe.

17 Manikámé we mía míai Wahnáh míre. We íre pukorahi aníne. Wehukene siuranka Maniká íre tagahrahewe. Webataq Manikáne. Ahriahri we anotah Wahnáh míéhre éq wenawíq pankereq wensabé iwíáh iwíáh atone. Aiq mire.

Ahbabáq sansansábé ahqáho ate peh kaweq sansá sehgio i ehwéhne.

18 Tímótio, are nénahni úkurone. Manikáne ehweh iraruro kegá are éhweh irarurowe. Minayabe sehgie sansa teawiníe. Sega iraruro ehwéh ahreraq matawé ahbabáq sansansásabé anotah-taq ahqáho ate Manikáne arambehri tauntahunue sehgio.

19 Manikáne sansá ambubu atawé kaweqtaq míéhnaraqmé arene aru ukiqme míaniewóne.

Táhmaro kegá ahbabáréra siru págegeuronsabé anetaníbo íwíahéra Sísane sánsá sinehepeq sutowe. Sinehepeq sutonsabé abehq úkurowe.

20 Mina tahnsanuya aníté sensíwíq Íménéúsireq Árékásántareq míéhye. Segá Manikánsabe éhruruuyansabé owainawanka anotahtaq kamah arinara siahtebageheéna owainawapa míáhtao arítóge.

2

Ómi keyábé púrerarítáhro i ehwéhne.

1 Téhwe sehgie ehwéh teawiníe. Ómi keyábé mahraoro terio. Manikánsabe kawerónę ue iwíah íwíah ateq mah kehiná kéhínánsábé iwíahue púrerarítáhro. Manikánka séhréh aritankéhboq púrerarítáhro terio.

2 Ite pehwehrue méq tabasíwe méq kaweqtaq míanehboq wahnah kereq anotah anímárlínseqsabé púrerarítáhro terio.

3 Minawé kaweq sansáne. Manikámé ite kaweraiteh ání púana mi sansá miraúna keyábé awahbehre.

4 Wega moke mah kehiná kéhínánká aiq pútaq ehwéh ahtebéyabe awahbehre. Ahtebehrataq wega kaweraitahráhire.

5 Manikámé peh morá áníne. Wehukega Maniká tagariageheéna mibeq mahbeq aritéh ánímé peh morá Sísá Karáhé míéhre.

6 Ómi ite insahwé aitanieéna avehraq tanáhráq itene ahbabáqsabe pukúwe. Pukúnsabe Manikánka ite sokigiéna, Moke mah kehiná kéhíná kaweraiteyabe nuwahbehre uraire.

7 Mi ehwéh síwáhnorinkeheéna Manikánka eqmaq núwátáire. Íné íre péhenia peh aiq pútariahnsanuge. Nahnso kegá aiq pútaq ehwéh irera Manikáne sansá ahtebageheéna koreri terinúno éna eqmaq núwátáire.

8 Íné nu wahbeh sansá teawiníe. Arega ómi kehiná su wahpeqte wéhyábé síwáhnoré mahraré, Weho, ibiahnsanome ehwehome pehragéq peh kaweqtaq méq iyahnkara pankeqme púreroro ue síwáhnorúno.

Ahreronsábé kaweqtaq míáhro arito i ehwéhne.

9 Mó ahréró síwáhnoro ahréróno, tabasíwe méq kawerue inerinerue míáhro. Áhnte awahriq naneq pehragéq peh ábéráhna korósí sukiwe míáhro. Pásésuqme áhnte moné tahnса korósíwe awahriq naneqmarínsábé íre iwíáh íwíáhoro.

10 Íre iwíáhquéq peh Manikáne ehweh sehgieq mó naneq mó naneq kaweq arámbéhríoro. Íre korósi peh itega kaweq arámbéhríome itene awahriq naneq tahnса kéhre. Íné Manikáne sansá tagarióge irari inínká miraínaraq aiq kawerinae.

11 Momiwíorabeq ahreronká íre ehwehnia peh ehiya méra Manikáne ehweh kawerue irera ahtebagehe.

12 Momiwíorabeq ahre inínká weh wahnahnue síwáhnorineho. Írakaumo. Síwáhnorinehboq peh ehiyamé ehweh irankéhe.

13 Ahrerono, írátíáhro. Téhwe Manikánka Éhráma mirarena anehe wene ahre Íwi mirarowe.

14 Éhrámaga owainawane péhe éhwéh íre aiq pútare atowe. Írakaumo. Peh wene ahregá

owainawane péhe éhwéh irena Manikáne ehweh anteruowe.

¹⁵ Ahre inínká Sísane sánsá ambubu atawéna mó keyábé arutaboiréna kaweqtaq ména tabasíwe míahnaraqmé aiq kaweq sansáne. Mina tahnса inínsónká ani maqmaréhrataq Manikánka kaweraritankéhe.

3

Peh kaweqtaq míáh kégá Sísа tagariáh kéráq wahnahnoraho ehwéhne.

¹ Sísа tagariáh kéráq wahnahnéyabe awahbeh anímé anotah kawéq árámbéhrí miraéyabe awahbehre. Minawé aiq pútaq ehwéhne.

² Sísа tagariáh kéráq wahnahné arambehri miraéyabe awahbeh anímé peh kaweqtaq míá míai anínká wahnahnorahire. Peh morá áhré matiéh anímé, tabasíwe míeh anímé, uwaresa anímé, tábúsoqme iwíáhi anímé, nahnsø mehwehue kiraboi anímé, Maniká awahbeh sansá kawerue síwáhnororahi anímé, peh mina tahnса anínká Sísа tagariáh kéráq wahnahnorahire.

³ Mi arámbéhrí íre wahnahnorahi anínsábé teawiníe. Píah néna múgu wahgu aruqaruri anímé, móneyabé arutaboiri anímé, tobeh aruqaruri anímé, ehweh aruqaruri anímé íre wahnahnorahire. Peh uwaresa anímé wahnahnorahire.

⁴ Wene ani ahre kawerue wahnahní anínká Sísа tagariáh kéráq wahnahní aní míahrahire. Sibowáné ehweh íre irasa pehipi anterúáh anímáríné sibowáwé íre wahnahnorahire.

5 Wene ani ahre íre kawerue auráq matiah-naraqmé Sísa tagariáh kéráq árahue kawerue wah-nahnorahiro?

6 Peh amahnága Sísansabé aiq pútare atéh áninká íre wahnahnorahire. Peh amahnága aiq pútare atéh áninká wahnahnínaraq píribahriéna, Íné anotah aní múge íwíáhinabomo. Iwíáhínaraqmé Manikánka naho owainawa kamah awunserah kamah awinawire.

7 Sísa íre tagariáh kégá, Peh kaweq aníne atáh ánime Sísa tagariáh kéráq wahnahni aní míahrahire. We íre kaweq aní míre íwíáhirataq sega éhruruirana owainawanka mi aní saiqnarianawire.

Peh morá kaweq sansáno ke Sísa tagariáh kéné morábí matiáh ménsáméhnsátáq wahnahnoraho ehwéhne.

8 Peh kaweqtaq méra kaweq iwíáho kegá Sísa tagariáh kéné morábí matiáh ménsáméhnsátáq wahnahnorahowe. Píah naruqnaruro kewé, mó kené ménsámehnsánsabe aigará pabeki kewé íre wahnahnorahowe.

9 Siru ukiqme méra peh Manikáne sansá kawerue ambubu atiáh kégá wahnahnorahowe.

10 Téhwe pehgáriq arámbéhrí sieq áhwárawe tagahro. Tagehrataq kawerue arambehriéra kaweqtaq mía míairataq morábí matiéhra mensáméhnsátáq wahnahnorahowe.

11 Sene ahrero moq peh kaweqtaq mía míao inínsó míéhrataqmé sensuwehqsonka wahnahnorahowe. Sene ahreronká péhe éhwéh íre aritera peh tabasíwe míéhrataqmé sensuwehqsonka wahnahnorahowe. Sene ahreronká íre sibitarusa peh

kaweq arámbéhríéra mó ke séhréh arítéhrataqmé sensuwehqsonka wahnahnorahowe.

¹² Peh morá áhré matiáh kewé sene ani ahre kawerue wahnahno kewé mi arámbéhríráq wahnahnorahowe.

¹³ Sísa tagariáh kéné wahnahnka kawerue wahnahnotaq tagah kegá sensíwíq pankeráhwe. Sensíwíq pankeráhwara kawerue wahnahnéra íre áhreia Sísa Karáhé éhweh pahsuqme teriéwe.

Manikáne sansá áwahewé anotah naneq mire i ehwéhne.

¹⁴ Pehgáriq tanáhráq areba koraganie íwíáhéna mah pahsí sehiranue áwúge.

¹⁵ Areba íre apubúue konaraq arega Sísa tagariáh kegá momiwíirarabeqte sánsámé Manikáne animárínsábé ahreraq matiankeheéna mah pahsí sehiranue áwúge. Maniká oga mía míairaq ite Sísa tagariona ke wene animári míone. Awankátate nah pegiqmáráhnserah ite Sísa tagariona kegá momiwíorabeq aiq pútaq ehwéh pankerone.

¹⁶ Ite kawerue tagarionawe Manikáne kaweq sansá nahomé kopéq kowana Sísa tutai puana amahnága ábóraragire. Wene sánsá áwahewé anotah nanere. Minayabe mah igónkónká aiq mahraréna,
We wehukení úkúwara wehukega we tagowana
Manikáne Awanka wene sánsá peh kaweq sansáne atowe. Íopeqté kegá moq we tagowe.

Manikánka wene kaweq matábúrápéq tumerena,
Mahtaq anotah Wahnáh ání míahno atowe.
Mó kegá we éhweh mah kehiná kékíná míáhrabeq teriéwara mah marákó márákóípéqté íráh kegá wensabé aiq pútare átahwe ire.

4

Péhe éhwéhnká wehukene iwíáh íre kawerarítéhre i ehwéhne.

¹ Anehe tanáhráqmé táhmaro kegá wahnsane péhe éhwéh irera sehigigéhe. Mó kegá owainawa-maríné ehweh síwáhnorirara irera Sísane sásá suagéhe. Minayabe Manikáne Awanka aiq pah-suqme iraruraire.

² Péhe éhwéh irera sirupipeq múguwahgu agéra ahbabáq sansansábé íre siyehitáhnara peh péhe éhwéh síwáhnorigehe.

³ Péhe éhwéh síwáhnoréra, Mahbiga ahre mewe weh úkiyehboq peh ítaq mahbígáú mía míaoro éra mó naneq tahutáhúq órira míre ahriahri awehri-oró éra síwáhnorigehe.

Moke táhutahuqme Manikánka aiq mirarowe. Minayabe wensabé aiq pútare atera aiq pútaq éhwéh írátíáh kégá wensabé kaweróne atera mi tahutáhúq pehipi nahwe.

⁴ Moke Manikánka miraro naneqme aiq kaweq nanere. Minayabe itega íre awehria peh wensabé kaweróne ateq pehipi nanehe.

⁵ Manikánka moke táhutahuq nah naneq mire insabé itega wensabé kaweróne atona puaq íre awehria pehipi nóne.

Poraga Tímótinsabé Sísane kaweq arámbéhri ání míahno ato ehwéhne.

⁶ Arega mah éhwéh Sísa tagariáh ké síwáhnorinaraq Sísa Karáhéne kaweq arámbéhri ání míankehe. Aiq pútare atahna éhwéhnká are págege ataráirah kaweq sansá ambubu atiarone.

7 Ahbabáq áwahe ehwehmé, múguwahgu ehwéhmé pehragáhno. Peh Manikáne kaweq sansá miraúno.

8 Wehukene ayahnsa págege arite sansamé ákáhtaq kaweq sansáne. Manikáne kaweqtaq mé sansámé anotah kawéq sánsáne. Wene sánsá sehgió kégá amahnága oga míáh tánáhráqkákáq mókakeakáq oga míáoneherawoe.

9 Mah ehwéhmé aiq pútare atéhrataqmé aiq kawerinae.

10 Maniká oga míá míá anínéna moke mah kehiná kékhná merirena kaweraritahráhire. Wensabé aiq pútare atáh ké aiq kawerarítéhre. Minayabe aiq pútare ateq págegeue arambehriúne.

11 Mah ehwéhmé síwáhnoré, Kawerue sehgióro terio.

12 Are íre anonani míahnayabé mó kegá awiréh atéhrataq ahqáho arito. Peh kaweq ehwéh iraré kaweqtaq míá míáé mó keyábé arutaboirúno. Aiq pútare atahna sansá ambubu atawé peh kaweq sansá miraúno. Sísa tagariáh kégá are tagéra arene sánsá miraigehboq teawú éhwéh sehgio.

13 Areba íre apubúue konaraq wehuke míáhtáq Manikáne ehweh sáhnsahwe pahsuqme kawerue síwáhnorúno.

14 Aboawah wehgá siyahnkaratáté arenaneq táhtoréra Manikáne Awanka iwíáh arítárái ehwéh irarurotaq Manikánka págege atáráire. Segá iraruro ehwéhmé kawerue ahreraq matawé sehgio.

15 Arene arambehri kawerue miraúno. Ómiga tagéra kaweq sansáne íwíáhigehboq teawú éhwéh ambubu atawé sehgio.

16 Arerensabéákáq arega síwáhnoróna ehwéhkákáq auráq matiahno. Teawú ehweh ambubu atawé sehgio. Mirainaraqmé íre arebataq áhnte arene ehweh íráh kéreq moq oga mérapeq awaq miagéhe.

5

Poraga kaweq siwáhnóré sansa Tímóti teawu ehwéhne.

1 Arega aboawah wehreq orerónseq ehweh terínaraq píribahriinehboq arenabouránsábé tábúsoqme ehwéh teawenanserah pehwehrue terio. Mahbireq o menáhwénseqsabé arenábáq áwáhnorónanserahnue kawerue síwáhnorúno.

2 Aboawah ahrérónseq orenínsónseq arenanoura auráq matawé séhréh atahnanserahnúno. Ahre ahrariyabé arenanahno auráq matawé séhréh atahnanserahnúno. Sene sinonkataq táhtoréhnehboq pehragé séhréh arito.

Kéweinínsó kiraboé ehwehne.

3 Íre aninkákáq óréni kéweinínsábé kaweq sansánúno.

4 Kéweiní wene aninseq anahwareq míéhrataq sega auráq matawéra kiraboigehe. Sinoiboga sene animári ebeq kirabouronsabé se ore orení úkirataq sene animárínká se kiraboigehe. Sene kárironaní kiraboéyabe seyene arambehrie. Minawé Maniká awahbeh sansáne.

5 Íre aninkákáq anahwankákáq kewéínímé orení úkínaraq wega iwíáhéra, Manikánka séhréh aintankéhe ire. Minayabe wega wéhékáhnkakaq

inokáhpeqkakáq Manikánsabe, Íné séhréh ainto éna púreq aruqarurire.

⁶ Mah marákóípéqté náneqsabé arutaboiréna peh we awahbeh naneq sehgí kewéínimé pusa aní tahnsa míéhre.

⁷ Minayabe keweinínsónsábé mah ehwéh kawerue síwáhnorúno. Sega kaweqlaq mía míairataq mó kegá se íre síehruruigehe.

⁸ Wehga wenawahrahreq wene kárironanínseq íre auráq matawéna kiraboiínaraq Sísane sánsá aiq anterúéh púana anotah ahbabáq sánsánire. Mi ahbabáqká Sísa íre tagariáh kéné ahbabáq aiq kio-taikire.

⁹ Sísa tagariáh kégá morábí kiraboigehboq keweinínsó síwíq sehiranúno. Orenímé 60 opéq sotaiki orenímé peh morá wéhráq míarai inímé wenawíq sehiranare kirabooro arito.

¹⁰ Mó kegá, We kaweqlaq arámbéhrí mira aruqarururai iní míre atáh inímé kirabooro arito. Wene animári kawerue sóránkirai inímé, nahnsó mehweh aritena kirabourai inímé, Sísa tagariáh kégá íre wahtopeqte surowana sigarár pabeq pabeq arítárái inímé, suwahre ke soberurai inímé, mó ke kawerarítárái inímé mina tahnsa kaweqlaq arámbéhrí mira aruqarururo kewéínínsó síwíq sehiranúno. Mina tahnsa inímé orení úkínaraq Sísa tagariáh kégá morábí kiraboigehboq.

¹¹ Kiraboirataqmé o ahré kewéínínsó síwíq íre sehiranúno. Téhwe Sísa Karáhéne arambéhrí mireoneheqmúne iraréra anehe mi arámbéhrí sine-hepeq suera wehkigehe.

¹² Mirairataqmé seyene ehweh anterúáhnsábé itene Wahnhahnka ehweh aritankéhe.

13 Segá taoraho ke úkéra mó kené nahtapeq poku pokuéra íre sereq wehgaq naneq mire éra éhruruirataq sensíwíq pehragáhno. Mina tahnса kewéínínsó síwíq íre sehiranúno.

14 Íné teríumé o ahré kewéínínsónká mó wehkéra ani maqmarera kawerue sóránkírataqmé kaweq sansá míre. Kaweq sansánowara itene naruoga sene kaweq sansá tagéra íre íehruruorahowe.

15 Táhmaro kewéínínsónká Sísane sánsá sinehepeq suera owainawa kérówe. Minayabe tagaríahwe.

16 Sísa tagariéh ínínká wenawahrah kewéínínsó kirabo arito ato. Sísa tagariáh kégá keweini kóréní wene iyahnabo íre míéhrataq wahba kirabo atahro arito. Peh morá sensuwahrah íre míáh kewéínínsómé Sísa tagariáh kégá wahba kirabo aritahro arito.

Sísa tagariáh kéráq wahnahno ke séhréh ariteq náriéro i ehwéhne.

17 Sísa tagariáh kéráq wahnahno kegá kawerue wahnahnirataq sensíwíq pankereq awehraq apéq nári nárinoro terio. Segá Sísa éhwéh tei teinéra íwáhnorirataqmé anotah iwíáh íwíáh ariteq awehraq apéq nári nárinoro terio.

18 Minayabe Manikáne ehwehnka aiq mahraréna,

Káhoga sera sombirah arámbéhríínaraq wene áwéhraq íre músu atáhro. Pehipi nankehe ire.

Wene ehwehnka mó mahraréna,

Ite séhréh aitéh ání awehraq apéq náwéro ire. (*Lo 25.4; Mátíyu 10.10; 1 Kórína 7.9*)

Mina onserah Sísa tagaríáh kéráq wahnahno kegá kaweruwe arambehriirataq awehraq apéq nári nárinoro terio.

¹⁹ Peh morá áninká Sísa tagaríáh kéráq wahnahni anínsábé ehweh atahnaraq mi ehwéhmé íre iro. Téhranítégábópoq apahránítogábópoq ehweh atéhrataq sene ehweh iwíáhue tagáhno.

²⁰ Wahnah anímárinká ahbabárirataq áhnte wehuké momiwíorabeq mó wahnáh ání mó wahnáh ánínue ehweh arítáhro terio. Mó wahnáh kégá irera áhreéra kaweqlaq mía míaigehboq ehweh arítáhro terio.

Poraga Tímótinsabé miraúno i ehwéhne.

²¹ Peh morá sánsá ómi keyábé miraúno. Anotah anínseq arenawahrahreq mó sansá miraé moke mó ke mó sansá miraé anotah íre kawerinae. Ómi keyábé peh monseráhnue iwíáhue saraqmaro. Manikánseq Sísa Karáhéreq Manikánka omaq sito íópeqté kéreqka tagariáhwe. Segá tagariáhtáq mahna teawú éhwéh sehgio pahsuqme teiúge.

²² Sísa tagariáh kéráq wahnahni aní míankeheé íre apubúue ayahnkara táhtoqme omaq ato. Mó áninká ahbabárnaraq arega moq mina tahnas-ninehboq peh kaweqlaq mía míaúno.

²³ Are awahreeé arupipeq érinsabé íre peh morá wání náhno. Náhniáq sera anonkakaq pehgáriq náhno.

²⁴ Mó kené ahbabáq ábóraq kékhrara tagah kegá ehweh arítáhwe. Mó kené ahbabáq amahnága íre ábóraq kék púana peh mókake ábóraq kanawire.

²⁵ Mina inserah wehukene kaweqlaq arámbéhrí ábóraq kékhrare. Kaweqlaq arámbéhrí íre apubúue ábóraq kahnaraq minaakaq mókake ábóraq kanawire.

6

*Arambehrio keyábé kawerue arambehrioro i
ehwéhne.*

¹ Sísa tagariáh ké arambehri keyábé mahraré, Itene wahnah kené ehweh kawerue ireq sensíwíq pankeráhro arito. Itene wahnah kegá itene sánsá tagéra Manikáne ehwehnsabé ahqáho atera wenawíqsabe éhruruiyehboq kawerue arambehrioro arito.

² Arambehriraq atéh áninká Sísa tagariahnaraq wene arambehri áninká iwíáhéné, Íné arambehriraq intéh ánímé nánuwah tahnsá míéh púana peh taoraho arámbéhríinie íwíáhineho. Írakaumo. Kawerue iwíáhinkehboq mi aní áwáhnoruno. Mi áninká arambehriraq atéh ání arutaboirue séhréh atena kawerue arambehriinkehboq áwáhnoruno. Arambehrio kegá mira íwíáhirataq sega anotah kawéq árámbéhrío ke míagehe.

*Móneyabé arutaboirome ahbabáq áwahe wíre i
ehwéhne.*

Wehukega kaweq sansá miraigehboq teawú éhwéhmé ahriahri síwáhnoré kawerue sehgóro arito.

³ Itene Wahnah Sísa Karáhéne aiq pútaq éhwéhká Manikáne sansá kawerue íwáhnori. Mi éhwéh suena peh mó éhwéh áwáhnori animé

⁴ we píribahri aní ména peh íre íréh ání míéhre. Peh ehwehéyabe awahbeh aní míre. Wega síwáhnorirara wene ehweh íráh kégá mó keyábé íre kaweq iwíáhéra ehwehéra síéhruruéra

⁵ tobehéra ahbabáq iwiáhowe. Ahbabáq iwiáhéra aiq pútaq éhwéh íre irera peh múgu wahguowe.

Múgu wahguonsabé péhe íwíáhéra, Ite Manikáne sansá sehgiunayabé áhnte mensáméhnsá pehipi meyaneheqmúne íwíáhowe.

⁶ Manikáne sansá sehgiunaraq wega áhnte kaweq naneq nái náinire. Ménsámehnsánsabe íre irutaboiria peh wega nái naneq awehraq kékre íwíáhúnaraq itene iru ukiréhre.

⁷ Iteinoréhga maqítáhtáq íre ménsámehnsánkakaq maqítáhwe. Ite pukonaraq íre itene ménsámehnsánkakaq mewe eq pukoneheqmúne.

⁸ Minayabe táhutahuqkakáq korósiakáq kahnaraq, Aiq awehraq kékre íwíáhoneheqmúne.

⁹ Áhnte moné meyanéhe íwíáho kewé ménsámehnsánsabe sirutaboiro kewé ahbabárarahow. Sirutaboiro naneqka kahnkapi wah pariéhnserahnire. Se sirutaboiro naneqka ahbabárarítéhre.

¹⁰ Mónayabé arutaboiré sansamé ahbabáq áwahe wíre. Mónayabé sirutaboiro puara táhmaro kegá móne meyaneheéra Sísane sánsá sinehepeq sutowe. Minayabe sirupipeq anotah uméh meyáhwe.

Oga mía mía sansá ambubu atawé sehgio i ehwéhne.

¹¹ Are Manikáne ani móne. Wene ani míahnayabé ménsámehnsánsabe arutaboirineho. Moke íre kaweq sansá anehepeq suo. Kaweqtaq mé Maniká awahbeh sansá sehgio. Manikáne ehwehnsabé aiq pútare ate mó keyábé arutaboirúno. Kaweq sansá págegeue sehgie uwaresa ání míahno. Mi sansámáriñsabé arutaboiré sehgio.

12 Árésísi anínká, Íné kiotaikinauge íwíáhéra pe-hbeheráh pokire. Mina inserah arega Sísane sánsá ambubu atawé mahraue iwíáhéra, Íné kiotaikéna oga mérapeq awaq mianauge íwíáhúno. Arega, Íné Sísansabé aiq pútare atena wene sánsá sehginauge iraruronaraq áhnte kegá írátówe. Mi tanáhráq oga mérapeq awaq miankeheéna Manikánka omaq atáráire. Minayabe oga mía mía sansá ambubu atawé sehgio.

13 Moke oga míona naneqmarí Manikánka oga míáhro aitéhre. Manikánseq Sísa Karáhéreqka tagariehyataq teawú éhwéh iro. Wahnah aní wenáwíqtare Póntíasa Páíraga Sísa ehweh atotaq Sísga íre áhreia pahsuqme teawuwe. Manikánseq Sísa Karáhéreqka tagariehyataq Sísga pahsuqme teawunserah ínéga are teawúge.

14 Sísga íre áhreia pahsutainserah ínéga teawú éhwéh kawerue tábúsoqme sehgio. Peh morá áhwára áhwára sansá íre miraúno. Amahnágáákáq mókakeakáq itene Wahnah Sísa Karáhéga tuina tanáhráqkákáq kawerue sehgio.

15 Manikánka webataq omaq atárái tanáhráq Sísa tuinawire. Maniká webataq moke mó wahnáhmári kiotaiqme aní púaq wensabé iwíáh íwíáh atone.

16 Webataq íre pukorahi anínéna peh ahriahri mía míáéna wehukega íre pokorahi téhrehrabeq mía míaire. Wehukega sene siuratate we íre tagahwe. Sega we íre tagahrahewe. Wega ahriahri wah-nahninkehe. Wensabé iwíáh íwíáh atone. Aiq miraoneheqmúne.

Áhnte mensáméhnsá matíáh kékabé éhwéhne.

17 Mah marákóípéq méra áhnte monéákáq ménsámehnsánkakaq matiáh kékabé píribahri iyehboq sene ménsámehnsánsabe íre iwíáh íwíáhoro terio. Ménsámehnsánkakaq móneakáq apubúue taqnobagína nanere. Minayabe iwíáh íwíáhiyeho terio. Itene irupipeq eyoyóinkeheéna Manikánka áhnte kaweq naneq nái nainire. Minayabe peh wensabé aiq pútare ateq iwíáh íwíáh atáhro terio.

18 Kaweq sansá miraoro terio. Mó ke séhréh ariteq kawerarítáhro terio. Anah ke míéhboq wehweh ke míáhro terio.

19 Mirairataqmé sene ogamé tanahráq peh kaweq tanahráq kanae. Mókake oga mérapeq awaq mera peh kagaorahi apéq meyagéhe.

20 Tímótio, teawú éhwéh auráq matawé ambubu atiahno. Íre Manikáne iwíáh peh wehukene iwíáh ehwéhmé pehfragáhno. Abehq múguwahgu éhwéh pehfragáhno. Mi éhwéhnsábé táhmaro kegá ahtebia éhwéhne atáhwe. Ahtebia éhwéhne atáh kegá péhe íwíáhowe.

21 Mi éhwéhnsábé iwíáh íwíáho kegá Sísane sánsá sinehepeq súáhwe. Manikánka itensabé arutaboiréna séhréh aitéhre.

**Manikáne O Ehwehne
God's New Talk: The New Testament in the Awa
Language of Papua New Guinea
Nupela Testamen long tokples Awa long Niugini**

copyright © 1974, 1997 Wycliffe Bible Translators, Inc.

® Faith Comes by Hearing

Language: Awa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 28 Dec 2024 from source files dated 31 Aug 2023

9673cf68-887a-574e-9ac8-846469c86b12